

rior est usus, montes enim sunt glabri, minusque sylvis abundant. In finibus hujus æstuarii, nominatim in Longo & Finno, est quotannis ingens captura halecum, quæ per plures menses durat; ei incolæ magno studio & labore incumbunt, iis enim piscibus bona parte anni pauperiores vicini, præsertim ipsi piscatores, non solum in obsonium sed pro pane utuntur. Mercatores plurimum quæstum ex iis piscibus faciunt, nam eorum copiam exteris divendunt. Tota Regio continet plus minus duodecem Parochias sive vicinias, quæ singulæ habent sanctas ædes ad sacras synaxes. Familiae quæ hic habitant, vel terras habent, insigniores sunt hæ; imprimis Stuarti, quorum princeps Dux Levinus non solum hic ampla habet latifundia sibi propria, sed etiam dominium totius provinciae, à qua titulum dignitatis Ducalis habet in hoc Regno. Deinde sunt Cambelli, quorum Princeps Marchio Argatheliæ habet possessiones cum ædibus amplis ac arces. Tertio sunt Colchoni, qui plurima hic habent prædia & arces, nomen genti est à prædio ad Glottam cognomine, quod sic vocatur à curvatura vel flexura montis, Col enim sive Cul est flexura priscis nostris, à Græco *κολος*, id est curvus; & Chon est collis sive mons, à Græco *χων*; idem unde Chonocha priscis nostris pro clivo ad valles aquosas, & est nomen provinciae in Hibernia, sicut apud nos nonnullorum prædiorum. Post hos sunt Naperi, qui se ex antiqua prosapia Leviniorum dicunt prognatos, ad quos attinebat dominium provinciae antequam ad Stuartos perveniret. Ex his Naperis, quorum Philarcha fuit dum viveret, ortus est maximus ille Mathematicus Merchistonii Baro. Deinde sunt Parlanidæ sive Mardalani, qui suam etiam originem ad familiam Levinorum referunt. Postea sunt Alanidæ sive Machalani, item Haldeni, qui hic magnas possessiones & dominia habent. Sunt etiam ex Samplais quidam, qui hic prædia habent; item ex Hamiltoniis nonnulli, juxta Clydam. Denique ex Buchananis plurimi circa Blanum, Anericum, & Levinum, possessiones habent. Sunt & aliæ in hac Regione minores gentes, de quibus taceo hoc in loco. Bona pars valli Severi, ut alibi dicebam, per hanc transit Regionem, definitque ad Glottam prope Dunglassum, arcem Colchonneorum, sed de hoc alibi.

Insula in Lacu Lomundo.

YLand Vealich, longitudinis vix dimidiati stadii, fluvio Levinio proxima.

Dux exigua Insula (anonyma utraque) littori proximæ, ad porten ylen.

Yland Abyz, non procul ostio Ainrici fluminis. Yland Kerdaig, ex minimis una.

Yland Cuirnich, aut Kernaig, sylvosa est, habitata tamen.

Inche-Chaille, quæ vox Silvestrem insulam significat, culta & frugifera, habet etiam Ecclesiam parochialem. Ei ad euro-austrium objacet Turrinche, longitudinis prope trium stadiorum.

Huic propinqua est Lack-ow, exigua insula.

Kre-inche vix tractum arcus quantitate æquans. Carig-ow. Omnes hæ exiguæ insulæ proxime dictæ, interjacent Inche-chaille antedictam, & Inche-Mourin.

Inche-Mourin aut Inche-Merin, Marini Insula, prope viginti stadiorum longitudinis, omnes reliquas quantitate & nobilitate antecedit, messi & pastui accommoda, ædificiis culta, venationi cervorum apta, unde reges ea multum delectati, venatu frequenter illic se exercebant. Inche-Fadd ad tria millia illinc versus arctum, frugum ferax, nec sylvæ indiga, humili & laudato solo. Haud procul inde ad ortum hybernium abest Darrach, id est quercus insula. Inde ad quadrantem miliaris est Ylen Cowan, à Cowano, viro religioso & in iis regionibus Divo habito, nomen sortita. Paulum inde ad occasum cernitur Inche-Crowny, culta & incolis frequens. Proxima est Rosh, exigua insula & littori contigua, quod Errachar-moir nomen habet.

Huic succedit Carig-ow.

Kerdaig ad occasum proximat Inche-Crowny jam dictam, parva, & sylva obsita.

Vnde ad occasum succedit Yland na Bock, aut hircorum Insula, quatuor aut quinque stadiorum longitudinis.

Haud procul Marini insula ad occasum æstivum abest Inche-Moyn, longitudinis unius miliarii, ut plurimum sylvis aspera.

Inde ad occasum, stadii intervallo, proxima est Iland na Chastel, tota fere hedera oblecta, habet antiquam arcem unde ei nomen.

Ad tres inde sagittæ jactus sequitur Gowloch, è minimis una, non tamen arborum indiga.

Vnde ad occasum vergit Inche-Davannan longitudinis sesquimiliarii, & æqualis latitudinis, sylvis decenter sparsa, luxuriat hic genetia, multa sylvestrium baccarum genera, frequentes hic angues reperiuntur, quæ sese in tumulos attollit Tom-na-clag dicitur, amœnis habitationibus conspicua, hortis, & fructiferis arboribus nitida ad oram occasui hyberno obversam. Pertinet hæc insula ad Nobiliss. Comitem Glen-carniæ.

Huic adhæret inter occasum & meridiem Nowagin-sula, ab agnis nomen habens.

Ad ortum vero æstivum proxima est Inche-Connagan, milliari in longitudine expansa, latitudine dimidio minor, sylvis betulæ arboris vestita, non desunt arva frugifera, sed angues hic frequentes stabulantur.

Exigua insula anonyma, inter duas majores prædictas jacet.

Proximæ continenti Row-Chassil dictæ adhæret Yland Beg, cujus nomen exiguum sparium denotat.

Inche-Lonaig, sesqui-miliari longitudine, latitudine dimidia: hic taxus arbor frequens crescit, quæ nullibi in his insulis præter hanc conspicitur.

Huic ad meridiem vicina est Freuch-yland, exigua illa, & anguibus scatens.

Inde ad meridiem exiguo intervallo Cammer-Raddach, parva & sylvis vepribusque horrens.

Sequitur ad occasum æstivum Creig-na-Skarrow.

Ad littus Rosh dictum jacet Yland Rosh.

Et huic contigua Insula exigua, anonyma.

Yland na Darragan, à superiori ad tria millia, sylvis recta.

Vnde ad arctum (ubi jam lacus angusto canali contrahitur) visitur Insula Notyr-Gannich dicta, quæ ab arenis nomen habet.

Supra eam ad septem millia passuum abest Yland Terbart.

At ab ea ad meridiem ad quinque millia passuum jacet Row-glask commodis ædibus Mac-Farlani Comarchæ visenda.

Ab insula Terbart ad tria millia passuum ad septentrionem Yland Ow, amœnis habitationibus, hortis, & viridatis distincta.

Inde ad tria millia passuum ad initium totius Lacus Yland Eaunlich, culta, & habitata.